

Despedida na un gran persona

Señora Carla Paris-Arends

SEÑORA Carla Paris-Arends a bira miembro di Women's Club of Aruba (WCA) na 1980. Despues di a sirbi comunidad di Aruba boluntariamente pa 40 año, WCA a duna Carla reconocimiento y na 2020 el a ricibi e status di Life Member.

Carla tabata semper un miembro estricto y cu hopi bon argumento na bienestar di su Club stima. Su profesion di docente tabata pa instrui esnan rond di dje pa por traha segun reglanan sea di trabao of servicio na bienestar di nos comunidad y te hasta den gobernacion. P'esey mes Carla a ofrece pa duna lesnan di Procedementonan Parlamentario (Parliamentary Procedures) na otro miembronan di WCA.

Carla a traha riba nos Constitucion & Statuto (Constitution & Bylaws / C&B) pa WCA por a keda inscribi na KvK na 2007. Ta p'e motibo aki mes cu a keda acerca Carla pa su opinion te na ultimo, pa si tin duda riba interpretacion di cualquier parti di nos statuton. Carla semper tabata dispuesto pa yuda unda cu e tabata por. Esaki tabata muestra su amor grandi pa nos Club sin kit'afo si, cu e por tira bo cu e C&B ora cu bo no tabata pone atencion na su recomendacion. Carla tambe por tabata masha bon den duna curashi pa efectua cualquier proyecto y sa di duna bo *'een klop op je schouder'* pa un bon resultado.

Carla a sirbi WCA como presidente na año 2002-2003 y a haci esaki eficientemente cu su miembronan di directiva. Esnan cu traha cu ne den directiva a keda impresiona cu su maneho. Carla lo keda semper recorda positivamente y su añanan di servicio lo ta bay ta visibel den e Historia di WCA, cu pronto ta obtenibel publicamente na Biblioteca Nacional.

E trayectoria di Carla den WCA ta manera ta sigui:

1986-1987 Tesorera y miembro di comision di Student Awards.

2000-2001 Tesorera y editor di nos boletin mensual

2001-2002 Secretaria di correspondencia y editor di nos boletin mensual

2002-2003 Presidente di WCA

2003-2005 Ex Presidente y advisor parlamentario

2007-2008 Tesorera y Chairman comision di Statuto

2008-2009 Chairman di comision di Statuto

Fuera di tur esaki, Carla tabata yuda den varios comision pa cu nos proyectonan. Pa nos di WCA, Carla tabata un miembro ehemplar y sigur inolvidabel p'esnan cu a conoce y cu a traha cu ne. Su conocimiento di diferente materia



mundial, social, financiero y gubernamental tabata representa den su biblioteca personal cu ta masha impresionante. Y cu su inteligencia, e tabata dispuesto pa comparti cu nos tur, pa nos por a hiba WCA dilanti y produci proyectonan masha exitoso mes. Cu tristesa na nos curason, nos ta bisa Carla, AYO te despues. Danki Carla, pa tur locual bo a contribui na club y comunidad!

Na number di directiva y tur miembro di Women's Club of Aruba, condolencia na su yiunan, su rumannan y demas famia. Hopi forsa pa por pasa den e tempo di tristesa y falta di Carla!